

Oqaluuserisassanut nassuiaat.

(Inatsisartut Siulittaasuat)

Aalisarnermut, Piniarnermut Nunalerinermullu Ataatsimiititaliaq qinnuteqarpoq oqaluuserisassani immikkoortup 55-ip aappassaaneerneqarnissaata UKA2017-mut kinguartinneqarnissaanik.

Immikkoortup 55-ip qulequtaraa: Siunissami aalisarsinnaanermut akuersissutip aqutsisoqarfimmi ataasiinnarmi atorneqartalernissaa -taamatullu aqutsisoqarfiup "Kalaallit Nunaata sinnerata" siunissami aqutsivinnut immikkoortunut arfinilinnut aggornilersorneqarnissaa (Maniitsoq, Paamiut, Qaanaaq, Sisimiut, Kalaallit Nunaata kujataa aamma Tasiilaq) anguniarlugu sinerissamut qanittumi qaleralinniarneq pillugu nalunaarut allanngorteqqullugu Naalakkersuisut peqquneqarnissaannik Inatsisartut aalajangiiffigisassaattut siunnersuut.

Kultureqarnermut, Ilinniartitaanermut, Ilageeqarnermut Ilisimatusarnermullu Ataatsimiititaliaq qinnuteqarpoq oqaluuserisassani immikkoortup 127-p aappassaaneerneqarnissaata pingajussaaneerneqarnissaatalu kinguartinneqarnissaannik, Immikkoortoq maanna juunip ulluisa aallaqqaataanni aappassaaniigassanngortinneqartoq, juunillu ulluisa arfernganni pingajussaaneerneqassalluni.

Immikkoortoq 127-p qulequtaraa: Uunga siunnersuut : Folkehøjskolit pillugit Inatsisartut inatsisaata allanngortinnera pillugu Inatsisartut inatsisaat nr. xx,xx.xxx 2017-imeersoq.

Ilaqutariinnermut Peqqissutsimullu Ataatsimiititaliaq qinnuteqarpoq oqaluuserisassani immikkoortup 56-ip UKA2017-imut kinguartinneqarnissaanik.

Immikkoortup 56-ip qulequtaraa: Angajoqqaat naartunermut, erninermut meeravissiarnermullu atatillugu sulinngiffeqarsinnaatitaanerisa sapaatit akunnerinik sisamanik sivitsorneqarnissaa siunertarlugu Inatsisartut Inatsisaata nr. 14-p 17. december 2009-meersup allanngortinnissaanut siunnersuuteqaqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut. Allannguut atuutilersinneqassaaq ulloq 1. juli 2018 aallarnerfigalugu.

Inatsisinut Ataatsimiititaliaq qinnuteqarpoq oqaluuserisassani immikkoortup 111-p aappassaaneerneqarnissaata juunip ulluisa arfineq-aappaannut kinguartinneqarnissaanik. Immikkoortup 111-p qulequtaraa: Inuup sananeqaataasa ilisarnaataannik qitiusumik nalunaarsuiffik pillugu inatsisip atuutilersinneqarneranik peqqussutissamut siunnersuut aamma inuup sananeqaataasa ilisarnaataannik qitiusumik nalunaarsuiffik pillugu inatsisip, eqqartuussisarneq pillugu inatsisip aamma qamutininik assakaasulinnik nalunaarsuisarneq

pillugu inatsisip allanngortinneqarnerannik inatsimmi § 1-ip Kalaallit Nunaannut atuutilersinneqarneranik peqqussutissatut siunnersuummut (Naalagaaffinnik Den Europæiske Unionip avataneersunik inuup sananeqaataasa ilisarnaatai, pussuit ipaasa assilineqarnerinik aamma qamutit pillugit paasissutissanik paarlaateqatigiittarneq) Namminersorlutik Oqartussat oqaaseqaateqarnissaat pillugu Inatsisartut aalajangiiffigisassaattut siunnersuut.

Kultureqarnermut, Ilinniartitaanermut, Ilageeqarnermut Ilisimatusarnermullu Ataatsimiititaliaq qinnuteqarpoq oqaluuserisassani immikkoortup 112-ip aappassaaneerseqarnissaata juunip ulluisa aallaqqaataannut kinguartinneqarnissaanik. Immikkoortup 112-p qulequtaraa: Tunumiut Kalaallisuunik Kalaallisuuliornermut Ilinniarfissamik Naalakkersuisut Tasiilami pilersitsiniarnissaat pillugu peqquneqarnissaannik Inatsisartut aalajangiiffigisassaattut siunnersuut

Taasisarnerit pillugit isumaqatigiissuteqarput:

Mala Høy Kúko, Atassut aamma Martha Lund Olsen, Siumut